



Cun luschezza preschentan las scolaras ed ils scolars da la 3. e 4. classa da Savognin il cudesch «A las otg sper l'arca». FOTO G. N. STGIER

Trais pinguins e plaz èsi be per dus

Nov cudesch per uffants en rumantsch grischun

■ (anr/gns) **Las scolaras ed ils scolars da la 3. e 4. classa da Savognin han gì visita da Rino Darms, il president da l'Uniun rumantsch grischun (URG). Vegni en la chapitala da Surses è el dentant betg cun ils maunvids, mabain cun in cudesch per mintga singul scolar.** Dapi che l'Uniun rumantsch grischun (URG) è danovamain vegnida clamada en vita il 2007 e cunzunt puspè activa èn gia cumparids nov cudeschs per uffants. Gist frestg or da la stamparia è la pli nova ediziuin, pli bain ditg il 10. cudesch per uffants che

l'URG ha edì. Sco gia tar l'ediziuin dals auters nov cudeschs è er il pli nov cudesch vegni preschenta en ina scola cun rumantsch grischun sco lingua d'alfabetisaziun. «A las otg sper l'arca» sa numna il pli nov cudesch per uffants scrit en rumantsch grischun. Cun plaschair han las 20 scolaras e scolars da la 3. e 4. classa da Savognin retschet il cudesch da *Rino Darms*, il president da l'URG, l'uniun cun actualmain radund 100 commembers. Cun lur scolasta *Luzia Plaz-Sonder* han ils mats e las mattas legi inginas parts or dal cudesch e confermà

quant bain ch'els dumognan il rumantsch grischun. Tema central en il cudesch èn trais pinguins che vulan tuts trais ir sin l'arca da Noa, nua che be dus han dentant plaz. Il pli nov product da l'URG cumpiglia 64 paginas e vegn da la plima d'*Ulrich Hub* e per las interessantas illustraziuns segna *Jörg Mühle*. Il cudesch «A las otg sper l'arca» è adattà per uffants a partir d'otg onns e da retrair quel per diesch francs è pussaivel tar la Lia Rumantscha ubain en tut las librerias che vendan cudeschs rumantschs.